

ziffer 0. das bezeichnet nichts. Was dann bleibt / von gradus / zeichen vnd minuten / das ist der mittellauff des Planeten / den du gesucht hast.

### Das dritt Capittel.

Im dritten Capittel folgen die Exempel / wie man den mittellauff vnd waren lauff aller Planeten rechnen soll / ohn alle grosse mühe ganz leichtlich.

**I**m Ersten hab ich gesetzt die Radices aller Planeten / vnd auch des Drachenhaupts / auff die jar Christi / Monat / tag / stunden vnd minuten der stunden / vnd ist vber eine jede Taffel insonderheit beschriben / welchem Planeten ein jede zugehört.

Itē / es ist einer geborē im 1529. Jar / den 8. tag Januarij / nach mittag vmb 7. vhr vñ 53. minuten. Wilt du nun den mittellauff vnd waren lauff hierauff rechnen / wie die Planeten in obgemeldter zeit gestanden sein / so müst du erstlich mit dem 1528. Jar Christi eingehen / welches ist das volkommen verlauffen Jar / vnd die radices / so du da findest / die schreyb für dich / vnd weyl kein Monat darüber verlauffen ist / dann die geburt ist im Januario geschehen / darumb gehe zu dem achten tage / welcher geneñt wirt der acht Januarij / vnd schreib die radix vnter die vorigen zeichen

D ij vnter